

Storia kona ba Madre Caterina Daghero

Madre Caterina Daghero, “Madre doben liu entre madre sira seluk”. Nune’e haktuir iha fotografia periodu uluk nian, primeira susesora Santa Maria Domenica Mazzarello ne’ebè governa Institutu Filhas de Maria Auxiliadora.

Caterina Daghero moris iha Cumiana, iha distritu Torino, iha loron 7 fulan Maiu tinan 1856. Papá no mamá nu’udar agrikultor. Nia mak nu’udar oan feto mesak ho maun alin nain tolu.

Nia ba eskola to’o terseiru ano, hatudu ninia atitude sira ne’ebé di’ak. Kolabora mos iha atividade agrikula no serbisu sira uma laran nian.

Nia mak labarik-feto ida ne’ebé refletiva, la koalia barak, maibé ho espíritu laran di’ak nian. Nia partisipa ho ksolok iha vida parókia nian, nune’e bele tuir Misa loroloron. Iha devosaun forte mariana ne’ebé manifesta partikularmente iha fulan Maiu.

Tempu badak deit mate mai dere nia odamatan: uluknanain nia alin ki’ik ida mate depois nia mamá mós mate. Tan razaun ida-ne’e, ho tinan 12, nia mak tau matan ba nia alin mane ne’ebé kiik liu no mos ba sira nia uma. Liu tiha tinan rua, nia aman káben fali ho Angela Ruffinatto. Caterina tulun nia iha uma, la haluha ninia kompromisu sira nu’udar katekista no apóstola ativa entre Filha de Maria.

Ninia prima, Rosa Daghero, deside atu bá Mornese hodi tuir bolun ba vida konsagrada iha Institutu Filhas de Maria Auxiliadora ne’ebé foin hahu.

Husi Mornese Rosa hakerek ba Caterina, kona ba klima iha comunidade. Ksolok husi ninia prima novisia ne’e, hadaet ba nia hanesan resposta ba lian interiór ne’ebé bolu nia.

Iha loron 16 Agostu tinan 1874 nia mos to’o iha Mornese, ho tinan 18. Ba nia hahu tempu ida luta interior nian.

Nia hakerek ba nia papá atu mai foti nia no husik hela bagajen iha sala resepsaun, maibé Madre Mazzarello intervein ho firmeza: “Labarik-feto ida-ne’e destinadu atu halo buat di’ak barak”.

Madre Mazzarello insiste atu bele simu nia ba vestisaun. Krize vokasionál ultrapasa tanba obediénsia. Iha loron 8 Dezembru tinan 1874 nia tama novisiadu.

Ho hakmatek nia hela iha novisiadu no iha loron 28 Agostu tinan 1875, halo ninia profisaun relijiosa iha Don Bosco nia liman. No loron hanesan Maria Domenica Mazzarello no primeiru grupu Filha de Maria Auxiliadora halo sira nia profisaun perpetua.

Iha loron hirak ne’ebà nia fo fiar ba irman Enrichetta Sorbone, nune’e: “ha’u gosta liu atu konsola, konsola...” Hafoin fulan ruma deit, hela hamutuk ho Madre Mazzarello, iha loron 29 Marsu tinan 1876, irman Caterina viajen ba Torino, uma dahuluk ne’ebé loke husi irman FMA sira besik Basilika. Iha sira na’in 5: diretora mak irmán Elisa Roncallo no nia (Madre Daghero), mak nu’udar vigária.

Sira loke kedas Oratóriu Domingu nian no oratoriu lor-loron, hafoin laboratóriu no eskola gratuita. Pasa ninia tinan dahuluk sira vida relijioza saleziana nian iha eskola Don Bosco no Don Rua nian, ne’ebé nu’udar diretor ba Oratóriu femeninu.

Irmán Caterina hanorin no estuda makas. Hetan diploma edukadora nian iha loron 30 Agostu tinan 1877 iha eskola Dominikana Carcassone nian (Mondovì, Cuneo).

Iha Outubru tinan 1877 nia hetan bolun fila fali ba Mornese, tan iha ne’ebà laiha mestra ba internadu sira. Iha loron 8 Dezembru tinan 1878 nia halo nia votu perpetua.

Iha Outubru tinan 1879 nia fila fali ba Torino nu’udar diretora comunidade nian, ne’ebé kompostu husi FMA nain 29 no novisia ida.

Iha Marsu tinan 1880 nia hetan bolun fali ba Nizza Monferrato, obediénsia ida ne’ebé halo nia hakfodak: nu’udar diretora ba comunidade foun St. Cyr sur Mer iha Fransa. Nia ba ho libru gramátika no disionáriu ida hodi hahú estuda lian-fransés.

Iha loraon 22 Maiu nia hakerek ba Irmán Elisa Roncallo nia mamá: «Ha'u la iha ona aten-brani atu hateke no ko'alia kleur ho ha'u-nia Irmán doben sira, hodi hanoin katak ha'u tenke husik sira no karik la bele hasoru tan ona sira! Maibé ida ne'e mak Maromak Nia hakarak, nune'e la buat ida... Ha'u prontu halo sakrifisiu sadeit ba Maromak. Oh, furak tebes atu halo nafatin ha'u nain Jezús Nia hakarak».

Iha komidade, St. Cyr sur Mer, iha uma ida ba orfanatu mane no feto ne'ebé dirije husi fundadór, Abade Jacques Vincent ho madre tersiáriu fransiskana balun. Ninia superióra hela ona iha ne'e durante tinan 34! Ba tersiáriu sira, la'ós fásil atu submete ba diretóra ida ho tinan 24 sa tan estranjeira ida! Maibé Irmán Caterina konsege manán relijioza no menina sira-ne'e nia fuan.

Iha Agostu tinan 1880 Madre Mazzarello bolu Irmán Caterina fila fali ba Nizza. Hodi partisipa ezersísiu espirituál no Kapítulu Jerál ba eleisaun Superióra sira-nian. Madre Mazzarello eleita fali nu'udar Madre Jerál no Irmán Caterina nu'udar Vigária Jerál.

Iha loraon 14 fulan-Maiu tinan 1881, madre Mazzarello mate.

Nia hateten ba irmán Caterina: “Aten-barani bá. Husi Lalehan ha'u sei reza ba ó no ó tenke haksolok nafatin.”

Iha loraon 12 Agostu tinan 1881 selebra eleisaun ba Superióra Jerál foun. Iha eleitóra na'in 21 no prezide husi Don Bosco, ho Msgr Cagliero nia tulun. Irmán Caterina Daghero eleita nu'udar Madre jeral!

Nia iha tinan 25 no presiza dispensa husi Don Bosco, tanba nia falta tan tinan sanulu atu bele sai nu'udar Madre Jerál. Nia sei gia Institutu durante tinan 43.

Don Bosco fó ba nia kaixa ida ho “amaretti” (dosi moruk) no ida ho “confetti” (dosi midar) no karta autógrafu ida-ne'e:

Reverenda. Madre Superiora Jeral.

Iha ne'e iha dosi sira atu fahe ba ita-boot nia oan-feto sira. Rai ba ita-nia an rasik buat ne'ebé midar atu pratika nafatin ho ema hotu; maibé ita-boot prontu nafatin atu simu “amaretti” katak hahán moruk sira bainhira de'it Maromak hakarak haruka sira ba ita-boot. Maromak haraik bensaun ba ita-boot no haraik virtude no korajen atu santifika ita-boot no komidade tomak ne'ebé entrega ba ita-boot. Reza mai ha'u ne'ebé iha Kristu Jezús. atan haraik-an Padre Joao Bosco.

Iha loraon 16 Outubru tinan 1881 Madre Caterina bá hasoru Amu-Papa Leão XIII (sanulu resin tolu).

Durante ninia governasaun, nia sei konhese Papa na'in 3 seluk: Piu X (sanulu), Bentu XV(sanulu resin) no Piu XI(sanulu resin ida). Aleinde Don Bosco, referénsia seguru ida ba nia, bele fó konfiansa ba orientasaun husi Reitór-Maior sira Don Miguel Rua, Don Paolo Albera no Don Filippo Rinaldi.

Superiora Jerál joven ida ne'e iha Konselleira sira ne'ebé matenek no sabia: Vigária Madre Enrichetta Sorbone, Madre Emilia Mosca, Madre Elisa Roncallo no ekonoma mak Madre Anna Tamietti. Kona ba sira ema hateten nune'e: "Sira haré malu di'ak loos!" Madre Caterina enfrenta knaar ida ne'e ho aten-brani. Nune'e mak nia dehan kona-ba nia an rasik: “Ha'u mak bin ida ne'ebé hadomi imi no, hamutuk ho imi, hadomi imi-nia klamar nia di'ak”. Ha'u hatene didi'ak fuan umanu nia susar sira no ha'u aprende ona atu fahe laran-susar ba sira."

Programa ida ne'e mak dudu nia atu halo viajen: “presiza haré ho ita nia matan no kaer ho liman rasik”. Ninia viajen liu dala atus haat (400).

Ba dahuluk iha Fransa iha 1882. Iha nasaun ida ne'e nia ba dala 30!

Husi Feveireiru too Maiu tinan 1895 nia iha Palestina ho ekonoma jeral madre Caterina Buzzetti. Loraon 1 (ida) Novembru tinan 1895 nia viajen ba Amerika Latina, hela iha ne'ebá to'o loraon 10 Agostu tinan 1897. Nia sae roo ho emigranti italiano sira, nain 1.200 (rihun ida atus rua) no vizita Arjentina (Patagonia- Terra del fuego) – Uruguai, Brazil (misaun Mato Grossu) – Xile - Perú. Iha tinan 1898 no 1909 nia vizita Aljeria no Tunizia. Dalabarak nia ba Espanha no nasaun sira seluk Europa nian. Nia halo vizita barak no beibeik ba komidade sira iha Itália.

Madre Caterina promove karizma nia buras iha kontinente 4, hodi haktuir katak “Iha ne'ebé ita-nia obra seidauk iha, ita tenke bá, ita tenke lori espíritu no Don Bosco nia Na'in Feto”.

Abertura uma foun sira tutuir malu ho ritmu ne'ebé maka'as:

1886 España
1888 Xile
1891 Béljika, Israel, Perú
1892 Brazil
1893 Aljéria
1894 Méxiku
1895 Tunízia
1897 Kolómbia
1898 Suisa
1900 Paraguai
1902 Ekuadór, Grã-Bretanha
1903 El Salvador
1907 Albânia
1908 Estados Unidos
1910 Honduras
1912 Nikarágua
1913 Síria, Turkia
1914 Áustria
1915 Ejitu
1917 Kostarrika
1920 Irlanda
1922 Kuba, Alemanha, Índia
1922 Panamá, Polónia
1923 Xina

Uma sira ne'ebé loke hamutuk 652 no sira ne'ebé taka hamutuk 175): loke iha Amérika Sentrá 20, iha Amérika Norte 5, iha Amérika Súl 109, iha Europa 30, iha Itália 254, iha Médiu Oriente 5, iha Ázia 3.

Institutu, iha Madre Daghero nia tempu, celebra Kapítulu Jerál ualu no hahú hosi tinan 1908 organiza hodi harii Inspetoria sanulu dahuluk ho sira-nia uma formasaun rasik. Bainhira nia mate, Inspetoria no Visitatoria hamutuk 25.

Iha tinan 1907, Institutu pasa husi forma “agregasaun” ba Sociedade Saleziana ba autonomia jurídika. Iha loron 7 Setembru 1911 Institutu hetan aprovasaun pontifisiá ho Dekretu Laudis relasionadu.

Iha tinan 1914, hahu fo sai surat sirkular numeru dahuluk, ne'ebé fó forma komunikasaun ida no formasaun ba Institutu hotu ne'ebé estável to'o ohin loron.

Iha tinan 1917 publika nekrolojia dahuluk. Tuir mai redasaun husi “Cenni biografici” ne'ebé sei sai volume “Facciamo memoria”.

Durante Madre Daghero nia ukun iha eventua importante seluk ne'ebé akontese:

tinan 25 fundasaun Institutu nian, iha tinan 1897, no inísiu ba kauza beatifikasaun Madre Mazzarello nian iha tinan 1911.

Hodi konhese nia pesoalmente, Madre Daghero iha kompromisu atu mantein moris nafatin memória Madre nian iha FMA sira-nia leet. Iha apresentasaun nota biográfika dahuluk Madre Mazzarello nian, iha loron ida 1 Janeiru tinan 1883, nia hakerek: «Hili ita-nia doben Madre Superiora nia moris, ha'u sei dehan kuaze perfeita, sai nu'udar modelu ba ita nia moris».

Iha tinan 1913 Madre Daghero halo publika livrinhu "Máxima sira" ho ninia apresentasaun rasik no hakarak atu bele fahe kópia ida ba FMA ida-idak.

Iha loron 28 Maiu tinan 1911, harii ofisialmente asosiasaun Antigas Alunas, ne'ebé ativu kle'ur ona.

Eventu seluk ne'ebé iha importánsia boot maka uniaun hosi Irmán Ursulina sira Acqui nian ba Institutu Filhas de Maria Auxiliadora sira iha tinan 1913, celebraaun solene aniversáriu fundasaun Institutu nian ba dala 50 (tinan 1922) hodi haruka misionária sira nain 50.

Ninia esperiensa iha eventua sira susar nian:

- Don Bosco nia mate iha tinan 1888
- Don Miguel Rua nia mate iha tinan 1910
- Superiore Salesiano sira nia mate: don Costamagna, msgr. Marengo, don Paul Albera
- Filhas de Maria Auxiliadora oioin ne'ebé mate no ninia Konsiliera sira: Emilia Mosca, Elisa Roncallo, Angiolina Buzzetti, Madre Petronilla.

Eventu istóriu balun marka Institutu nia moris iha tinan hirak ne'e:

- Lei anti-klerikal sira iha Fransa (tinan 1903 too 1906)
- Rai-nakdoko iha Messina (tinan 1908)
- Espulsaun ba sarani sira husi Médiu Oriente (tinan 1912)
- Funu iha Balkanu sira no espulsaun ba Filhas de Maria Auxiliadora husi Scutari (Outubru tinan 1912)
- Funu Mundiál Dahuluk (tinan 1914 too 1918)
- Rai-nakdoko iha Gioia de' Marsi (1915) ho Filhas de Maria Auxiliadora nain tolu ne'ebé mate.

Iha sirkunstánsia hirak-ne'e hotu nia konvida FMA sira atu fuan nakloke, hodi serbisu makas, empenha an iha diresaun no kolaborasaun ho obra sira, hanesan ospital militar sira, resposta nesesária ida ba urjénsia sira tempu nian.

Nia mate iha loron 26 Feveiru tuku 5.00 dadeer: nia seidauk halo tinan 68!

Bainhira Madre Mazzarello mate (tinan 1881) iha Filhas de Maria Auxiliadora hamutuk 166 iha uma 26, ne'ebé situa iha nasaun 4: Itália, Fransa, Uruguai, Argentina.

Bainhira Madre Caterina mate (1924) iha Filhas de Maria Auxiliadora (FMA) hamutuk 4.276 (rihun haat atus rua hitu nulu resin neen) iha uma 487, iha nasaun 34 no kontinente 4.

Iha loron 12 fulan Agostu tinan 1881, Don Bosco dehan tiha ona katak: "Imi lakon ona Superiöra ida ne'ebé haraik-an, maibé imi iha ona ida seluk ne'ebé haraik-an tebes; imi iha ona santa ida, no imi iha ona ida seluk ne'ebé sei la menus."

Madre Enrichetta Sorbone, vigaria, nia fahe kona ba Madre Caterina: "Hodi haluha nia-an rasik, nia hakiak ita no mantein ita iha Venerável Fundador nia espírito".

Irman Elisa Roncallo hakerek ba nia mama: «... nia mak pérola ida Madre nian, kriatura ida ne'ebé ha'u sei lahatene oinsá atu define, tanba ha'u haré nia halo tuir deit Maromak nia fuan »